

Attractiva steila sursilvana

La Regiun Surselva sbassa il prezi digl abo dil bus da notg

Dad Andreas Cadonau / ANR

Sbassar il prezi e porscher dapli. La Regiun Surselva ha augmentau l'attractivitad digl abo dalla Steila Surselva, il bus da notg dalla giuventetgna sursilvana. A partir dalla fin dall'jamna vargada eis el puspei carraus, il bus da notg. Ina purschida specifica en favur dalla giuventetgna sursilvana alla tscherca da divertiment duront la fin dall'jamna mintgamai en funcziun naven da miez december entochen l'entschatt'avrel. Cun l'actuala entschatta dalla stagiun dil bus da notg numnaus Steila Surselva ein entginas novaziuns idas en vigur ch'augmentan considerabel l'attractivitad dalla purschida. Ils abonnements general e grischun valan da niev era per ils cuors dil bus da notg. Perencunter ha la Regiun Surselva sbassau igl abo dalla Steila Surselva per 20 francs e slargau sia valur. Ils possessurs digl abo dalla Steila Surselva pon far diever mintgamai la sonda naven dallas 19.00 da tutta purschida dil traffic public en Surselva duront la stagiun d'unviern. Entschiet ha la historia dalla Steila Surselva ils 21 da december 2002 sco project da pilot. Enteifer ils onns passai han ils bus da notg dil Survetsch autopostal Surselva transportau in grond diember da giuventetgna sin via segira en sortida e puspei a casa. Finanziaus vegn il survetsch entras contribuziuns da vischnauncas, cantun e sponsurs.

Dapli Steila Surselva

La Regiun Surselva sbassa il prezi per igl abo dil bus da notg

Dad Andreas Cadonau / ANR

La giuventetgna sursilvana astga selegrar. La Regiun Surselva sbassa igl abbonament per dil bus da notg sin 30 francs. El medem mument s'augmenta la purschida. Cun igl abo dalla Steila Surselva pon ins far diever la sonda a partir dallas 19.00 dall'entira purschida dil traffic public en Surselva. Il traffic public en Surselva daventa pli attractivs principlamein viers la giuventetgna sursilvana en sortida duront la fin dall'jamna. La Regiun Surselva ha sbassau igl abbonament dil bus da notg da 50 sin 30 francs. Ed igl abo serestrenscha buca pli sulet sin il bus da notg, mobein seslarga viers l'ulteriura purschida dil traffic public. La giuventetgna en possess digl abo Steila Surselva po far diever mintgamai la sonda a partir dallas 19.00 dils trens dalla Viafier retica da Castrisch entochen Mustér, dils bus da notg dalla Viafier Matterhorn-Gottard da Mustér entochen Tschamut e da tut ils cuors dad auto da posta naven da Glion en direcziun Laax, Mustér, Val, Sursaissa, Lumnezia, Ladir, Luven, Andiastr e da Tavanasa a Breil. Il bus da notg dalla Steila Surselva che cursescha a partir dils 15 da december entochen ils 6 d'avrel mintgamai la sonda sin la dumengia e la notg da Silvester plidentia, tenor las explicaziuns dil meinagestium dalla Regiun Surselva, per gronda part giuventetgna sursilvana. *Duri Blumenthal* ha explicau che la Regiun seigi sedecidida da sbassar il prezi digl abo dalla Steila Surselva perquei ch'igl abbonament general (GA), igl

abonnament grischun (Büga) ed ils abonnaments da lingia valien da niev era sin ils cuors dalla Steila Surselva. Medemamein risguarda il bus da notg abos da mesa taxa e cartas da plirs viadis. Bigliets singuls per ils cuors dalla Steila Surselva vegnan vendi per il prezi dalla tariffa normala. Cun acceptar quels abos e cartas da lingia fuss il prezi digl abonnament specific dil bus da notg cun 50 francs memia aults e buca pli attractivs. Denter 140 e 150 abos per il bus da notg venda la Regiun Surselva ed ella vul animar ulteriura giuventetgna sursilvana da cumprar igl abo dalla Steila Surselva.

Influenza surveseivla

Igl effect finanziel sin la reducziun dil prezi digl abo dalla Steila Surselva ei surveseivels, sco quei che Blumenthal ha explicau. Ina part dil preventiv da 90 000 francs dalla Steila Surselva deriva da sponsurs e dallas vischnauncas sursilvanas che contribueschan medemamein alla purschida inclus il cantun Grischun. Aschia che la cumpart davart dils abos ei buc ual aschi gronda. Tuttina vul la Regiun Surselva promover vinavon la vendita digl abonnament per il bus da notg instradaus en favur dalla giuventetgna sursilvana. E quella giuventetgna ha gia fatg persenn dallas novas tariffas e purschidas. Quei ha il menader sil Survetsch autopostal en Surselva, *Markus Büchler*, enderschiu davart dils manischunzs ch'han tgamunau la fin dall'jamna vargada ils emprems viadis dil bus da notg dalla stagiun actuala. Principalmein giuvnas e giuvens en possess digl abo grischun hagian demussau plascher da puder nezegiar il bus da notg. Auters senza abos che fetschien diever dil bus da notg sulet ina ga ni l'autra e stoppien pagar la tariffa normala forsa meins. Atgnamein fussen els predestinai da cumprar igl abo dalla Steila Surselva per 30 francs. Neuagiu da Mustér ha la Steila Surselva strihau in cuors, aschia che la giuventetgna dalla Cadi sin viadi viers Laax sto vegnir entochen Glion cul tren e midar leu el bus.

Frequenzas tschessadas

Las frequenzas ein tschessadas el decuors dils davos onns e Büchler attribuescha quei fatg per gronda part al svilup demografic en Surselva. Pigl auter porschan divers survetschs da taxi alla giuventetgna la tariffa veglia dil bus da notg da tschun francs ed empleinan bus pli pigns. Cun las midadas actualas ei la purschida dil traffic public denton vegnida in bionton pli attractiva. La Steila Surselva, il bus da notg per la giuventetgna sursilvana, exista gia dapi varga 15 onns.